

# Exposiziun i'l museum da la Clostra San Jon


**Müstair** In sonda, ils 24 lügl ha gnü lö l'avertüra da l'exposiziun «triptychon e metamorphosis» da l'artista GertrudAnn Wyden i'l museum da la Clostra San Jon a Müstair. Fin als 19 settember pichan nouv tripticons i'l clostrigl dal museum. Implü survain ün'installaziun da folias glüschaintas prunadas illa «cuschina naira» dal museum, d'ürant quel temp cha l'artista es a Müstair adüna daplü fuorma ed as transmüda sco üna metamorfosa.

Cul «Salve Regina» han las muongias da la clostra benedictina a Müstair cumanzà la vernissascha e l'artista GertrudAnn Wyden es gnüda salüdata amiaivelmaing. Cun seis tripticos ha ella schaffi üna relaziun tuot speciala culla Clostra San Jon. L'artista viva d'ürant ün mais illa clostra e lavura i'l atelier da la clostra. La directura dal museum, Elke Larcher, ha grond plaschair cha l'artista as vuol d'ürant quist temp confuonder cun l'istorgia da 1200 ons e culla spiritualità benedictina. Ils tripticos chi sun gnüts realisats ouravant markeschan il cumanzamaint da quista via. Ra-

duond 50 persunas han visità la vernissascha. Ils tripticos d'eiran al principi da la vernissascha amo serrats e sun gnüts drivits pür cur cha las muongias han cumanzà a chantar il «Magnificat». L'artista ha drivi mincha singul triptico i'l ritem dal chant e cumparüts sun ouvras cun clings ingluminats da culuors.

Fingià avant 11 ons ha GertrudAnn Wyden skizzà seis prüm tripticon illa clostra da Mustèr. Pür divers ons plü tard es ella darcheu gnüda inspirada da realisar tripticons. Ed ella ha decis da lavurar cun folias d'aluminium in differentas culuors. Las folias vegnan gramüschadas per survgnir la structura da chafuollezza. Quellas vegnan tagliadas in strivlas e cumpuonadas a clings da culur. Las ouvras survegnan la fuorma da tripticons quadrats, chi's laschan serrar e drivir sco ün altar cun alas. L'artista viva d'ürant ün mais illa clostra e muossa als 20 avuost las ouvras realisadas d'ürant quist temp.

L'exposiziun es averta da lündeschdi fin sonda da las 09.00 a las 12.00 e da las 13.30 a las 17.00 e la dumengia da las 13.30 fin las 17.00. (pl)



**L'artista GertrudAnn Wyden driva ün tripticon e preschainta la vita interna cun different clings da culuors.**